

四庫全書

史部

# 欽定四庫全書

史部

硃批諭旨卷二百十四之五

詳校官尚書臣德保

編修臣裴謙覆勘

總校官中書臣朱鈐

校對官監丞臣張曾炳

謄錄監生臣李全玉

欽定四庫全書

硃批諭旨卷二百十四之五

硃批郝玉麟奏摺

雍正十年八月二十八日署福建總督臣郝玉麟

謹

奏為據報進勦番社情形恭摺奏

聞事竊照臺灣北路土番自作歹以來原未懾以軍威  
經加懲創是以狡詐反覆焚掠村莊肆無忌憚自

提臣王郡同巡臺御史臣柏修率領官兵於七月

初六日到彰化縣之鹿仔港因值雨水之候道路  
泥濘暫住鹿仔港地方十六日天色開霽提臣即  
密遣官兵分作四路親身於十七日辰刻合攻附  
近縣治梗阻道路素稱強梁之阿東社歹番我軍  
鎗礮齊發社番逃遁入山官兵奮勇追趕擒殺番  
賊三名其被鎗礮打死者甚衆焚其草窠積聚燬  
其望臺瞭樓各鄉百姓奪其前被搶擄之牛羊農

具不計其數提臣即由阿東社到彰化御史臣柏  
修亦於是日由鹿仔港到縣二十二日提臣踏勘  
大肚各社歹番窺伺出入要口扼守把截隨據各  
營報稱歹番聞知各皆畏懼不敢復出又據稟報  
二十三日有南投北投猫羅三社土官通事帶同  
番仔駕駛牛車前赴軍前稟稱情願出力報效續  
准提臣王郡咨稱軍前官兵現在分為五協擇地  
安營拒其險要堵其捷徑俟內地官兵到齊道路

乾爽即便定期進勦等語臣查前撥官兵三千早經到齊欽奉

諭旨指示機宜續撥之兵三千名俱已分路近發又番見我官兵勢衆又見提臣統兵進勦軍威震赫逃匿山林苟延喘息目今秋潦已退溪水漸乾草木枯凋四面夾攻自能剋期撲滅臣思此種土番實與禽獸無異使經大創之後知

國法凜然不可再犯當縛其渠魁宥其脅從仰體

皇上好生之仁斟酌機宜行之臣已密劄提臣去訖至  
於經營善後事宜俟勦撫安輯之後容臣悉心詳  
籌

奏請

睿裁為此謹

奏

既興此番大舉務令克殲咸知凜畏不敢再蹈故轍庶  
幾一勞永逸慎勿少存姑息復遺患於將來也諸凡善

後事宜合於情理酌中為之

同日又

奏為恭請

聖裁事竊查臺灣道倪象愷情性偏執與人不睦是以  
由軍前檄調回府先經

奏明近又因諛道給民壯礮位器械等物伏路即有  
地方百姓喧譁謂民壯通番開闢道署諛道亦詳  
稱製給小礮箭鏃等項分遣民壯伏路乃有姦民

前至本道公館砍傷壯役等語據軍前署金門鎮  
李之棟亦具稟到臣臣節經批司將一切報案逐  
一提究通詳雖虛實遽難懸定但倪象愷既不睦  
於同官更不得兵民之心即回府治恐亦未協且  
報案累累均非面訊不可臣與撫臣趙國麟詳加  
商酌會檄調回省城恭請

皇上敕旨將倪象愷解任候審查臺灣道為全臺之首  
領統率府縣兼轄民番必須和平持正撫綏得法

之員方克勝任查閩省各道員或現任要地或出差辦銅又或才情辦事好者固有而於臺地之任不相宜者亦不便輕調臣再三斟酌查有漳州府知府張嗣昌為人謹慎和平才具練達且漳州密邇臺郡彼處風土民情該府素所知悉臣會同撫臣檄委張嗣昌前往護理臺灣道印務仰懇

皇上天恩俯念海外要地可否准其實授以示鼓勵  
洪恩出自

聖裁倘蒙

俞允漳郡亦屬緊要

臣

查有以同知銜管理晉江縣事

王之琦莅任已將三載於一應地方實心整頓辦

理妥協上年

計典曾經薦舉若以該員陞補漳州府知府亦屬人

地相宜

臣

謹繕具密摺恭請

聖裁伏乞

睿鑒謹

奏

照所請行該部知道

雍正十年九月十八日署福建總督臣郝玉麟謹  
奏為酌議臺地文員之年限以示鼓勵以昭畫一事  
竊查臺灣一府孤懸海外舊例文武各官三年俸  
滿即陞嗣經前督臣滿保條奏以熟諳之員難得  
請將道府廳縣已經任滿者再行加銜留任三年  
續又經前督臣高其倬奏請更定四年荷蒙

皇上洪恩俯念臺灣道府廳縣等官至期六年為滿又加以候缺交盤渡海之期實屬太久著令自到任之日為始將滿一年之期令督撫於閩省內地官員內揀選賢能之員到臺協辦半年之後令舊員回至內地補用并經部議期滿分別議叙加級原以調臺各員前後在臺為期不遠所以酌予加級實為允當迨至雍正八年復經前署督<sub>臣</sub>阿爾賽以調臺各員統計前後協辦之期不過年半而獨

當其任者不過半年恐庸員草率塞責請將調臺各員到任二年督撫另選賢員赴臺協辦等由

奏准現在遵行

臣

查臺員定以二年之限又加協辦

半年統計已二年半矣再加交代渡海為期不下三年而回至內地止予加級似非仰體我

皇上鼓勵海外臣工之意況查今陞陸路提

臣

王郡前

在臺灣總兵任內於雍正八年奏稱臺澎鎮協各員蒙

皇上特用受恩深重應遵照舊例三年報滿候用所有  
叅將遊擊守備等職請以二年俸滿及交代渡海  
實合三年之數等由經部議覆准令候缺陞用在  
案是同一在臺人員武職歷俸二年得邀陞用文  
員歷俸二年半僅議加級其例似未畫一臣愚以  
為臺灣道員職任監司身沐

皇上隆恩應照臺灣鎮協三年報滿恭候

聖明酌用至知府同知通判知縣各員似應照武職叅

將遊擊守備等官之例俸滿陞用庶文武陞遷年限畫一而臺地大員自必益加鼓勵出力報效於海疆似有裨益是否可行伏乞

聖主睿鑒謹

奏

此奏是該部議覆施行

同日又

奏為恭奏進勦逆番情形事竊查臺灣各番社復肆

焚掠經提臣王郡同巡臺御史臣覺羅柏修率領

官兵於七月十七日攻破阿束社及分協扼要定

期進勦各情形臣已恭摺奏

聞今查提臣王郡於八月二十一日同御史臣覺羅柏

修率領官兵三千餘名并義勇親丁人等分兵三

路進勦倡首作歹之南大肚社先於二十日分兩

路由水深流緩之處過溪設伏預防逆番來伏至

二十一日丑時大軍黑夜渡溪逆番見官兵勢衆

欽定四庫全書

碑批諭旨  
卷二百十四之五

其平時埋伏暗鎗冷箭俱無所施我軍鼓勇如入  
無人之境直逼逆社用大礮打開連斃六七番乘  
勢分左右前後環攻逆社圍柵土墩臺寨周圍十  
餘里移時勦洗逆番奔竄死於鎗礮者甚多牛羊  
器具俱為被害百姓搶回社厝糧食焚燬淨盡中  
北大肚二社全社泥首膝地乞降求生又有貓羅  
大武南北投沙轆等社前赴軍營叩首乞命酌量  
安頓又岸裏朴仔阿里史三社土官通事率領男

婦共二千一百餘名又大甲東南日南北等社土  
官通事率領男婦共六百餘名執旗掛彩跪投軍  
前情願出力堵截兇番嗣官兵又搜至各兇番積  
藏糧食之所兇番皆穿林而逃所積糧食盡行焚  
燬用礮火擊死衆多復又扎營徼霧揀絕其水道  
并安頓阿里史朴仔籬等處斷其後路南大肚社  
兇番懼怕畏服談社土官加九眉閣等亦各前赴  
軍營伏地求生提臣王郡飭令舉出兇番方准免

死現在北路一帶方圓八百里地方俱已安寧人  
民歸莊官兵義勇嚮導全軍無一損失現今只有  
枋山雙藁等社亦在過溪搜勦茲准巡臺御史臣  
覺羅柏修等咨會併據軍前各官飛報前來臣查  
逆番作歹南大肚係屬強梁倡首之社仰賴

皇上天威遠震將士爭先奮勇兇番一鼓成擒各社多  
已來歸未靖餘孽絕其糧米斷其食鹽勢窮力迫  
自可尅期搜捕殲除臣現在復劄提臣王郡確查

渠魁務必窮搜正法無使漏網脅從人等仰體

皇上好生之仁斟酌寬宥尤不可遽撤大兵務使衆番

心服凜懾

天威永不敢犯然後徐議撤回去訖至善後事宜容臣

悉心籌畫再行奏請

聖裁為此謹

奏

覽勦捕逆番情形深慰朕念

同日又

奏為遵

旨奏覆事雍正十年八月二十五日據

臣標外委千總

朱光正齋捧

臣前

奏請隨糧馬兵改歸步糧一摺欽奉

硃批所奏嘉是覽之前劉世明到京朕觀其人甚不妥  
協尚未料如此負心伊任內一切不及之處毋得代  
為隱諱悉行據實奏聞欽此

臣

查前督

臣

劉世明任

內雖無踰閑蕩檢然其不及之處仰蒙

皇上下詢

臣

又何敢代為隱諱

臣

案查前督

臣

劉世明

上年九月十七日

題報

恩賞兵丁生息銀兩疏內稱已於八月內開賞

臣

計其

月日是必開賞在先

題報在後也詎今不但未曾開賞且尚有本銀八千

餘兩未發

臣

奉

諭旨詳細斟酌照依滇粵之例勻給協營通盤打算儘

有寬裕現在會同撫臣趙國麟署陸路提臣阿爾

賽水師提臣許良彬

題覆請

旨是前督臣劉世明先不能上緊料理後復含糊具

題難逃

聖鑒者也再查從前欽奉

諭旨發往閩省試用人員委署試用之後察其人果可

用自應酌量才具之長短分別地方之繁簡照例  
扣限

題請實授如有實在不堪委用者亦應即為

題叅或咨回吏部使人知所勸懲實心出力報效庶  
於地方有益乃前督臣劉世明信用之人不得其  
當而又偏執已見多不察實分別

題請如候補通判王朝棟係雍正五年間奉

旨交廣東撫臣楊文乾帶往福建試用若能盡力即行

題補若不盡心辦事即給文咨回吏部之員歷經  
委署漳州府同知興化府通判仙遊縣泉州府通  
判延平府通判沙縣各印務是該員到閩已經六  
載署篆已經六任查其到處尚能勤慎辦公至今  
未得一缺其餘到閩候缺候補有曾再試三試歷  
今三四年不等者尚有二十餘員臣除將王朝棟  
現在

題請補用外餘亦逐一細察如從前歷試才可勝任

者次第請

旨遵行固不敢使才具平庸不能料理地方之員濫膺  
民社亦不敢使諳於吏治有志上進者一槩淹滯  
而不為鼓勵也又查前水師提標後營遊擊胡貴  
八年二月內在守備任內經署叅將鄭良達詳委  
看修各營戰船嗣因胡貴護理後營遊擊不能到  
廠經叅將張天駿另委千總許順看修後許順被  
提臣許良彬叅革又改委千總黃良看修內有萬

字二號一船係八年九月內據黃良具報興工其竣工日期亦係黃良具報竝無胡貴協看字樣後該船造不合式前督臣劉世明竟將胡貴

題叅荷蒙

聖明著令引

見胡貴經將修船緣由

奏明蒙

皇上因以胡貴監修船隻題叅殊屬屈抑

敕令臣等查叅通省員弁聞聽之下莫不感頌

聖明洞鑒隱微踴躍思報臣現在查案會同提臣許良

彬

題覆是胡貴之被叅亦前督臣劉世明不細心查明

致屬員有屈抑也以上事件皆臣查確理合據實

奏覆至此外督臣劉世明有無不及之處容再另訪

恭

奏再查閩省風氣較之粵東大相懸殊粵省陋習仰

蒙

聖恩屢頒

訓諭人人知改文武各員莫不歡忻鼓舞努力自效閩  
省文武兩途既少浹洽之心又乏踴躍之氣邇其  
所自總緣上下之情未孚事事交相推諉以致地  
方公務多有廢弛臣受

聖主再造洪恩敢不盡心整頓惟是知識短淺力恐不  
逮叩懇

聖恩指示教誨俾

臣

有所遵循則感戴

生成之德永無紀極矣

臣

謹繕摺覆

奏伏乞

皇上睿鑒謹

奏

劉世明前此一切謬誤卿竭力整頓務俾各得其宜

雍正十年十月二十一日福建總督

臣

郝玉麟福

建巡撫

臣

趙國麟謹

奏為買銅之洋船回棹有期委員之在蘇守候無益  
謹為酌量變通恭請

睿鑒事竊查閩省承辦銅餉每年上下兩運共該銅五  
十五萬四千三百九十九觔例應先期輪委道府  
前往蘇州採辦洋銅交解第辦洋銅必須先購倭  
照選商給價置貨出口而倭照每年有自一番起  
至三十七八番不等必挨順輪番給買不能越次  
先得且本年倭照務至本年正月初一日方許船

進東洋交界更因近年彼國產銅不敷多有上年  
倭照銅船在彼守候必待其依次買足方許本年  
倭照之船採買惟是本年倭照每為江浙等本省  
買去閩省辦員無可如何只得覓買下年之照按  
其年分番數再候上年倭照銅船買足纔得銅餉  
計其出洋回棹之期約須二十餘月若該委員照  
已買就商已招成將價給領之後即在蘇守候亦  
屬無益自應回任料理地方事務乃查閩省向例

委辦銅員印務即另委員署理必將銅飭交運起  
解清楚方許回任故該員等往往藉此逗留雖有  
時回閩因銅未起解亦不得接印視事臣等查道  
府俱蒙

皇上酌量才可勝任方行補授之員今辦銅各員因守  
候洋船在蘇閒坐不特有曠職守亦且貽誤地方  
即遴選委署亦難得人地相宜之人臣等悉心思  
維若委員承辦止遴員代理印務俟該委員到蘇

買就倭照招商給價之後即令回任其在蘇設有  
未完首尾即一面報明在蘇辦理若無可辦之事  
不得藉端逗遛回任之後或探聽回棹信息止著  
親信家屬并妥當家人在彼守候俟洋船回棹或  
仍令再往收銅交押運官起解前後往返每次屈  
指不過數月銅觔既得照例辦解地方亦得正員  
料理似為兩有裨益況查江蘇承辦人員原在本  
省固無庸離任委署浙江委員採辦亦止委佐貳

暫行協理辦員到蘇招商發價後即回本任從無  
委署之例福建與浙省接壤所爭不過旬日路程  
自可仿照而行除飭查明買照招商給價出口在  
蘇無事之員著令回任外臣等為地方現乏道府  
大員辦事辦銅人員在蘇閒住所有酌量變通令  
其回閩任事緣由理合具摺奏

聞伏乞

睿鑒謹

奏

所奏是如此庶免曠官廢職之失也

福建總督

臣

郝玉麟謹

奏為海疆要鎮重在得人據實恭懇

聖恩事竊查漳州鎮總兵初有德先因生患鬚疽病勢

沉重

臣

恐有誤地方營務經委福州協副將馬名

南前往協辦具摺奏

聞今該鎮初有德所患之疽醫治不痊於本年九月二

十六日身故

臣

准署陸路提

臣

阿爾賽咨并據漳

州鎮中軍遊擊文際高呈報除恭疏

題報外伏念漳州地處濱海界連粵省接壤澎湖最

為緊要該鎮事務非老成持重才能練達者勿克

勝任查福協副將馬召南歷練老成熟諳營伍整

頓有方委係才具出衆之員

臣

現在委令署理該

鎮印務但總兵職任封疆

臣

何敢冒昧陳

奏惟是漳州地方緊要實非他鎮可比

臣

既知馬召

南才堪勝任何敢緘默可否將馬召南補授漳州鎮總兵

洪恩出自

聖裁臣因地方起見不揣冒昧恭摺具

奏伏乞

皇上睿鑒施行謹

奏

漳州總兵一缺已有旨下部命卿會同阿爾賽酌選將

領遞行題補矣

同日又

奏為恭報蕩平臺番大捷事竊查臺灣北路土番逞兇不法殘害百姓擄掠村莊阻梗道路勢甚猖獗據臺灣總兵呂瑞麟請兵三千飛赴援剿臣隨即調撥官兵遴選幹練將弁李蔭樾等統領飛渡進剿一面

奏明令提臣王郡親往督征一面另行撥兵預備欽

蒙

皇上睿慮深遠以撥往之兵務須多備復經臣撥兵三

千名赴臺協同勦捕經提臣王郡先將附近彰化

縣治梗阻道路素稱強梁之阿束社一鼓勦除即

有南投北投貓羅三社土官通事帶同番仔駕駛

牛車前赴軍前情願出力報效續經提臣王郡勦

滅強梁倡首之南大肚社隨有中北大肚二社及

貓羅大武南北投沙轆等社乞降求生又據岸裏

樸仔籬阿里史大甲東南日南北等社情願出力  
堵截兇番經臣節次具摺奏

聞茲提臣王郡於八月二十五日分兵七路圍勦水裏  
逆社立時攻破遍行勦洗九月初三日有牛罵社  
并沙轆餘孽令加已烏臘二名詐降狡延隨經查  
出立時擒獲一面分兵圍勦又據水裏社降番獻  
出首兇眉箸等三名又擒獲阿勝萬等四名南大  
肚降番獻出首兇烏臘眉仲等五名俱即於軍前

正法示衆初九等日搜勦牛罵沙轆餘孽打死兇  
番衆多十六日勦雙薰猫孟等社用礮打死十四  
番中傷者甚多餘即逃入莞裏社後山十七日勦  
捕大甲西巢穴焚燒積糧十九日有吞霄莞東等  
社土官率領男婦三百餘名赴軍營乞降二十日  
叅將李蔭樾探聞各社逆番俱逃入小坪山稟報  
提臣王郡分兵三路於五鼓時直搗小坪山逆番  
巢穴逆番正在裝車別徙出其不意我軍掩至鎗

破齊發打死多番窮追至大坪山深林脚下逆番  
盡棄車輛馬匹等項惟有赤身逃入內山獲牛千  
餘隻馬八匹車數百輛焚燬糧食四百餘堆二十  
一日乘勢搜捕追至內山悠吾乃地方打死兇番  
甚多斬獲番首二十二日有吞霄大甲西土官率  
領男婦四百餘名泥首乞生二十六日有猫孟雙  
蒼莞裏等社土官率領男婦老幼一千餘名口前  
赴軍前叩首乞命二十九日又據吞霄猫孟雙蒼

苑裏房理五社土官阿帶等帶同番衆自行網綁  
訕赴軍營跪請受死經提臣王郡令其獻出首兇  
隨據雙蒼等社獻出首番媽媽等四十二名押解  
彰化縣收審又擒出漢姦胡清父子並戴偉坤黃  
寬蔡妹等五名聽候審究又擒出久慣作歹為首  
兇番大宛藥瓦里二名即行處死又擒獲大甲西  
首兇加臘猫倫等二十一名正法另獲壯番并番  
婦番仔等四十二名口發縣收審又據押出牛罵

社番一百九十二名沙轆社番男婦老幼二百九十餘名口交營看守完出首兇分別審擬安插其吞霄等社節次乞生各番逐一安頓訖現今北路方圓一帶地方道路悉皆寧靜百姓安居樂業商賈照常往來無不感激

皇恩歡呼載道據

臣

差探并軍前各官同提

臣

王郡等

星夜飛報前來除將現獲兇番飭令從重究擬以

彰

國法以安地方外所有蕩平臺番大捷緣由理合具  
摺恭

奏再查此次征勦臺番歷准提臣王郡同巡臺御史

臣覺羅柏修咨報長福營叅將李蔭樾事事爭先  
智勇出衆官兵義民人等亦莫不奮勇報效其出  
力用命之處容臣查明等次分晰造冊

題報合并聲明臣謹會同福建巡撫臣趙國麟合詞  
奏

聞伏乞

皇上睿鑒謹

奏

據奏兗番蕩平餘社傾心向化以手加額覽焉此次征  
勦官兵人等具題到日另有恩賚更有諭問之上旨命大  
學士轉傳

同日又

奏為請

旨事竊查署南澳鎮康陵原係金門鎮總兵於雍正九年正月內奉

旨著南澳鎮總兵張起雲署理福建陸路提督印務南澳鎮總兵印務著康陵署理欽此今查署陸路提

臣

張起雲於上年十一月內已經病故南澳係海疆重地臣查康陵老成練達熟於水師一切營務俱能整頓與南澳甚屬相宜可否將康陵實授南澳鎮總兵伏候

聖裁再查金門鎮總兵印務經前督

臣

劉世明等遵

旨遴選延協副將李之棟署理其延協副將等印務并  
經遞行委署在案除延協副將李之棟已於署鎮  
任內為捏報巡洋焚燬戰船一案奉

旨革職其金門一鎮亦經奉

旨將臺灣鎮總兵呂瑞麟革職著在金門鎮效力贖罪  
外所有延協副將遞署等缺可否容

臣

悉心細察  
於現署人員內有才具果與銜缺相稱者

題請補授抑或仍行署理之處合併陳明統候

睿裁批示祇遵臣因海疆營務緊要起見不揣冒昧恭

摺具

奏伏乞

睿鑒謹

奏

延協副將以馬驥補授已有旨矣其馬驥所遺原缺卿  
遞行題補可也

雍正十年十二月二十日福建總督

臣

郝玉麟謹

奏為遵

旨覆奏事竊

臣

恭摺

奏報蕩平臺番欽奉

皇上硃批據奏兇番蕩平餘社傾心向化以手加額覽  
焉此次征勦官兵人等具題到日另有恩賚更有諭  
問之旨命大學士轉傳欽此又接大學士鄂爾泰張  
廷玉來字內開雍正十年十一月十七日奉

上諭據郝玉麟奏稱此番征勦臺灣番叅將李蔭樾智勇  
出衆事事爭先等語朕查李蔭樾從前來京引見朕  
看伊人材精壯似有膽量原是記名上等之人今思  
臺灣地方緊要副將陳倫炯未知勝任與否李蔭樾  
既著有勞績或將伊補授臺灣副將陳倫炯調用內  
地是否人地相宜爾等可寄信密問郝玉麟令其據  
實回奏欽此遵

旨寄信前來臣捧讀之下仰見

聖主慎重海疆酌用人材之至意臣細察叅將李蔭樾才力兼優於副將總兵均能黽勉辦理惟查臺灣副將係水師員缺駐劄安平額設戰船五十六隻有督率兵船出洋巡哨之責李蔭樾從前歷任俱在陸路而水師似未諳練臣於未奉

諭旨之先已經

奏請將該員補授興化協副將現在候

旨至陳倫炯先任臺灣副將陞補臺灣總兵該地風土

向所熟悉水師船務亦稱諳練更兼撫馭有方番  
民至今感頌該員自本年任事以來辦理尚屬妥  
協臣現在委令協同臺灣道張嗣昌前往大肚溪  
一帶安插歸順土番務使得所而一時亦難得人  
地相宜之員堪以調補但臺灣地方緊要臣仍不  
時細察如有不甚相宜之處自當酌選妥員請  
旨調用斷不敢稍有草率致滋貽誤也緣蒙

諭旨事理謹繕摺覆

奏伏乞

睿鑒謹

奏

所奏是候另有諭旨由內閣頒發

雍正十一年二月二十日福建總督臣郝玉麟福

建巡撫臣趙國麟謹

奏為奏

聞事竊查陳奏使違禁販鐵出洋案內無照客民方成

等貨物經<sub>臣</sub>等審明

題請照例入官應俟部覆到日估變但查各貨物堆貯廈門近海潮濕之地已經三載俱有霉爛若再遲久必致漸成廢物且查方成等所帶之貨絲邊番襪等物原係販賣呂宋非內地適用之物雖有緞紬綾機係粉漿必仍賣給出洋商人方可得價而出洋商人向例在正月內開洋七月內回棹若過正月則各商貨物置就又不能另尋售主必

須又擱一年臣等是以先行估變據牙行人等約  
估止報稱值銀數千兩臣等查一船貨物雖除正  
經大商有照各貨先經給還外現在之貨豈僅值  
銀數千兩查副將張天駿為人誠實併遊擊胡貴  
熟諳貨物行情檄令會同廈門同知胡宗文帶同  
牙行逐一確估除去霉爛蟲蛀物件外實值屢鉤  
番銀三萬二百二十三兩零較前約估相去懸殊  
臣等隨飭趁此商人置貨出洋之候及時變賣已

據各商照依行例先繳一半銀一萬五千一百一十一兩零其餘一半俟七月內回棹照數交繳取有殷實行商連環結保先繳之銀現飭解貯藩庫另行咨部查核外但此等瑣事原不應上瀆

宸聰

臣

等因違禁事案理應完結謹此繕摺陳

奏伏乞

睿鑒謹

奏

如此實心任事何患諸弊不除吏治民風之不就理也殊屬可嘉

朕之獎許非為區區二三萬金估變之項而發蓋取卿等之存心耳毋得錯會

福建總督臣郝玉麟謹

奏爲遵

旨覆奏事雍正十一年二月十六日接到大學士鄂爾泰張廷玉來字內開雍正十一年正月十九日奉

上諭福建水師提督員缺甚屬緊要著郝玉麟於閩廣  
兩省水師總兵內有伊深悉可勝此任者揀選一二  
員密行奏聞候朕簡用爾等可寄信前去欽此臣跪  
讀之下仰見我

皇上慎重邊海封疆至意

臣

查福建水師提督駐劄厦

門為全閩各海口鎖鑰控制澎湖臺海外最關緊要  
必諳練水師營務熟悉邊海情形者方克勝任臣  
於閩廣兩省水師總兵內再四斟酌悉心揀選如

粵省碣石鎮總兵蔡添略熟諳水務實心任事雖才情稍覺拘謹而人甚老成堪任提督不致貽誤閩省總兵內惟新調臺灣鎮蘇明良才品兼優水務素諳亦可勝提督之任但蘇明良甫經調臺任事方新如蒙

聖恩將蔡添略補授提督臣無庸瀆請外倘蒙將蘇明良補授提督臺灣尤關緊要必得人地相宜有才  
有守者始克勝任查福協副將馬召南歷練老成

人甚妥當以之補授臺灣鎮總兵實能勝任臣愚  
昧無知荷蒙

皇上下詢敢不悉心揀選慎重籌思但識見短淺是否  
有當統祈

聖鑒謹

奏

蔡添略既屬新進資格未深兼之粵省熟諳水務者少  
正亦需員彈壓蘇明良固勝提督之職但臺灣甫經底

定綏輯事宜更為緊要豈可輕移至若馬召南材甚庸平向乃朕所稔悉近雖歷練何遽能改心易行耶試於此外另舉一員候朕酌奪如或不然王郡猶堪水師提督之任否總俟卿再加審度覆到之日有旨

雍正十一年三月初二日福建總督

臣郝玉麟福

建巡撫

臣

趙國麟謹

奏為撥運倉穀接濟隣省事竊照閩浙兩省壤地相連年歲米價時有傳聞上年閩省收成仰荷

聖主洪福各屬咸慶有秋惟接壤浙省之福寧州地方  
稍有蟲傷緣通省豐收米穀源源接濟至今米價  
不致騰貴浙省上年偶有數處收成稍歉米價漸  
至高昂臣等留心訪問今春愈為騰貴屬在隣封  
理應緩急相資今准浙江督臣程元章咨開據台  
州府詳稱去歲田禾間被蟲傷以致西成稍薄米  
價愈騰查閩省去歲年成甚豐現今米價平減詳  
請招商赴閩買運穀石赴台糶賣行司議詳批令

暫准海運通糶源源接濟移咨閩省出示招商并  
許浙商採買等語備文前來臣等傳同司道悉心  
酌議閩省雖連年豐稔緣山多田少產米無多兵  
民食指浩繁從前屢荷

皇恩截運江浙米穀及江西採買米石積貯以至今日  
得獲充裕是本地之米原無盈餘也臣等仰體

皇上厪念民生至意輾轉籌維查有臺灣府屬鳳山縣  
積貯各案內除本縣現存穀五萬四千餘石外另

有節年收貯八社地方倉穀二十四萬四千餘石  
今酌撥穀十萬石一面檄飭臺灣道府迅即遴委  
妥員照數運至廈門以備浙商採買運赴台屬糶  
賣接濟民食一面知會浙省督臣僉商來廈照依  
時價買運臣等竝檄閩省地方官出示招商買運  
赴台公平糶賣仍給以路照載明穀石數目到彼  
呈請所在有司驗明填照回銷庶姦商不致影射  
外運所有穀價俟秋收即行陸續買補還項在鳳

邑倉儲仍多貯蓄不致缺乏而浙省台屬人民得  
資接濟矣事關動撥倉穀理合繕摺奏

聞伏乞

睿鑒謹

奏

籌議甚好嘉是覽之

雍正十一年四月初五日福建總督

臣

郝玉麟福

建巡撫

臣

趙國麟謹

奏為二麥豐茂逾常早禾亦多暢茂謹據實奏

聞仰祈

睿鑒事

臣

等查閩省山海交錯人稠地狹比年以來仰

荷

皇上福庇屢慶有秋上年收成亦為豐稔惟冬季雨水

較少今春米價稍增

臣

等即將存貯江浙之米行

令出糶米價隨平迨至正二月間雨水雖有尚未

霑足幸得三月初十日起至十五六連日大雨查

據各屬報稱本年二麥結實甚屬豐茂現在收穫其早稻連得大雨及時栽插青葱盈野倍覺茂盛米每石自一兩起至一兩一錢不等價值甚平地方寧謐又據臺灣府暨所屬各縣稟稱臺地俱係稻田種麥者少現今早禾蕃盛倍常米穀價平民番樂業等語臣等查閱稟報不勝歡忭是皆我

皇上敬

天勤民太和翔洽之所致也所有二麥已經成熟現在收

獲以及早禾暢發情形理合據實奏

聞伏乞

睿鑒謹

奏

覽二麥早禾併米價情形朕為閩省黎庶曷勝額慶當  
愈勉誠敬以仰邀

天恩祐庇

同日又

奏為奏

聞事竊准浙江督臣程元章咨開據台州府詳請招商  
赴閩買運穀石赴台糶賣并咨閩省出示招商買  
運等由當經臣等查有臺灣府鳳山縣收貯八社  
地方倉穀二十萬四千餘石酌撥十萬石迅速運  
至廈門以備浙閩商人買運以資接濟情由先經  
具摺

奏明嗣經半月尚未有商赴買而臣等訪問台屬米

價甚昂若俟浙商來買運往誠恐緩不及濟擬就  
廈門存倉臺穀趁此南風便利委員先行運送二  
萬石赴台糶賣以濟民食但查浙省原咨止有招  
商買運之說所有閩穀運台照依臺價并一切運  
費與該處市價有無平減裨益於民之處難以懸  
定隨即差弁星夜咨商浙江督臣去後一面選委  
文武員弁行知廈門同知將收貯雍正九年臺穀  
內暫撥二萬石配定船隻等候俟鳳山縣運到倉

穀補款茲准程元章覆稱台屬需米甚切若得此  
二萬石穀接濟實屬有裨如須再撥容當酌量另  
行移咨備覆到臣等臣等即令預經委定員弁酌  
帶水脚銀兩於四月初三日兼程赴廈領運竝咨  
覆浙江督臣外所有運穀接濟鄰省緣由理合恭  
摺奏

聞伏乞

皇上睿鑒謹

奏

覽奏運穀赴浙情節知道了凡事咸應酌其緩急權其損益而為之豈可拘執一定耶

同日又

奏為據情遵例代奏仰祈

聖鑒事據福建巡海汀漳道郭朝鼎稟稱竊查隨任旗員子弟荷蒙

皇上天恩著令歸旗學習實

聖主造就人材之至意 朝鼎在泉州府任內欽奉

諭旨緣長子候選州同郭治向因抱病延醫調理具結

報明咨部在案嗣因 朝鼎仰蒙

皇上洪恩授今海疆要缺職司巡海兼轄汀漳二府竝  
有承辦修造戰船之任均關重務往來巡察督催  
修造不敢少懈一切稽查案卷察核戰船工程俱  
係長子郭治在署協幫辦理今病雖痊愈現在辦  
事稍知頭緒奉憲嚴催起程 朝鼎下情未敢上達

茲奉

恩旨凡子弟中有可以助其父兄辦理事務者道府等

官有督撫代奏之例

朝鼎

跪讀之下不勝感激涕

零伏念

朝鼎

雖生四子次子郭河年止七歲三子

寧武年止六歲四子春泉年止五歲俱屬幼稚惟

有長子郭治年三十二歲賦性固屬庸愚尚知謹

慎小心可以稍助

朝鼎

辦理公事理合瀝陳實情

懇請代達

天聽倘蒙

聖恩俞允准將郭治留隨任所不惟朝鼎得資臂指而

郭治得以漸習吏治亦當同效犬馬上報

君恩等情具稟前來據此

臣

等查汀漳道員職任巡防

兼有修造戰船等事現今該道名下承辦修造戰

船一百餘隻責任繁重該道郭朝鼎居官勤慎辦

事實心今據稟稱伊子郭治向經在署幫理請留

隨任學習等情

臣

等不敢壅於上

聞謹具摺代

奏可否准其隨任學習以助其父辦理事務

洪恩出自

聖裁伏乞

睿鑒為此謹

奏

郭治准留隨任學習移咨諒旗知之

雍正十一年五月初一日福建總督臣郝玉麟福

建巡撫臣趙國麟謹

奏為奏

聞事臣等撥運廈門臺穀二萬石前赴浙江台州接濟  
已於四月十三十六二十二等日陸續運送去訖  
正值風信順利約計五六日可到又聞浙省杭州  
府一帶民間食米每石價銀一兩七八錢不等被  
災窮民赴省城覓食者甚多惟目下正值青黃不  
接米價日漸增昂臣等查現今運往臺穀價值連

脚費等項運至乍浦每石不過一兩二錢上下較  
浙省米價似覺稍賤伏覩我

皇上厯念民生軫恤備至事關民食

臣

等自應悉心辨

理查原議撥運臺穀十萬石除已運赴台府二萬  
石外現今再撥二萬石委員照前由海運至浙江  
乍浦地方咨交浙省督臣即照原價糶賣以濟民  
食其餘六萬石現在預備停妥

臣

等再加細查彼  
省米價情形酌量辦理所有續運穀石前赴浙省

緣由理合具摺奏

聞伏祈

睿鑒謹

奏

浙閩連界文移甚便與談督商酌辦理可也

雍正十一年六月二十七日福建總督

臣

郝玉麟

福建巡撫

臣

趙國麟謹

奏為敬陳地方情形增改府州縣治以專職守事竊

惟閩省山海交錯幅員遼濶內為各省屏藩外控  
海洋諸島建置尤當得宜臣等荷蒙

皇上天恩畀以海疆重任凡屬地方事務共期悉心辦  
理不敢苟且因循致滋玩誤查福建福寧直隸一  
州東臨大海南接省會北連浙省溫處等郡西界  
建寧府屬悉係崇山峻嶺地方最關緊要知州本  
任有讞獄催徵各項公務而所轄福安寧德二縣  
刑名錢穀又均由其挾轉事務繁冗兼顧實覺勉

強又福州府屬古田一縣地處萬山之中延袤九  
百餘里共編都保五十餘處每年額徵錢糧二萬  
七千三百有奇習俗犷悍犯案累累應納錢糧歷  
年抗欠縣令親往徵比或審驗案件即相率逃避  
深山莫可踪跡惡習相沿竟為得計若不亟為整  
頓致使積惡日深罪不能宥法不可貸甚非仰體  
皇上如天之仁至其餘各縣以及村鎮緊要之處歷舉  
地方文武備載情形詳請改設移駐緣由臣等一

併行令布按二司暨各道轉飭確勘妥議去後茲據司道行據各府勘議會詳前來內稱福寧一州向轄福安寧德二縣兼與福寧鎮同城一切地方事務甚屬繁雜又係自浙入閩水陸通衢咽喉之地知州一員顧此失彼照料難周實覺勉強且與總兵體制未稱應請將該州改設為府除原轄福寧二邑外另設附郭一縣即以州牧原管之錢糧戶口專任辦理再建寧府之壽寧一縣離建寧水

陸共六百里路徑崎嶇離福寧止二百七十里平坦易行以之改隸新設之知府管轄甚屬近便則一府四縣體制以隆而督率分理之任亦各有責成矣又古田縣地方甚屬遼濶姦匪易於潛踪內地名雙溪一處離縣二百餘里山深路險民情尤為頑梗明季原設捕盜通判駐劄其地舊址猶存應於雙溪增設一縣即以古邑之二十至三十四都錢糧八千六百餘兩戶口萬餘分撥經管就近

化導每遇朔望宣講

上諭督率各鄉耆民朝夕訓誡涵濡歲月久風俗自  
能移易頑梗可除錢糧亦得清完其新設之縣亦  
隸福州府管轄又閩省下游泉漳二府俗悍民刁  
健訟好鬪所轄地方太廣實有鞭長不及之處應  
各設直隸州互相分理內有泉屬之永春縣接連  
興延漳三郡姦究易於透越重岡複嶺離府甚遠  
西北至德化僅三十里西南至大田一百一十里

應以永春縣改為直隸州以德化大田二縣歸其  
管轄再漳州府所轄龍巖縣上接汀州下通延建  
距漳州府竟有三百餘里一切公事呼應維艱查  
龍巖東至漳平西至寧洋各七十里應以龍巖縣  
改為直隸州以漳平寧洋二縣就近歸其管轄均  
於地方實有裨益等語臣等查福寧州實屬邊海  
要區為全閩屏障應請改設知府添設附郭一縣  
以隆體制以專職守至雙溪地方係古田縣要隘

之區四面環山每致歲姦聚匪應設縣治以彈壓  
化誨至永春龍巖二邑議改為州均係因地制宜  
臣等非敢草率更張因再四斟酌實於地方有裨  
其添改府州縣應需佐雜等官及各緊要村鎮移  
駐改設之處容臣等斟酌附疏  
題請惟是臣等知識淺短是否可行不敢冒昧具  
題合先具摺奏

聞伏乞

皇上睿鑒批示遵行謹

奏

事關增改府州縣治具疏題請候朕裁酌

同日又

奏為奏

聞事竊<sub>臣</sub>等案准浙江督<sub>臣</sub>程元章咨撥運臺穀赴台

州府接濟民食一案續據各委員毛永清等稟稱  
押運穀船於四月二十五并五月初七八等日陸

續抵台查得該處米價每石賣銀一兩三錢有零  
自穀船到後每石止賣銀一兩二錢米價漸平民  
情歡悅所有運到穀石現在地方官盤交等語又  
臣等前因浙省杭州府米價賣銀一兩七八錢時  
值青黃不接倘日漸騰貴民食維艱酌議再撥二  
萬石運至浙省乍浦地方咨交督臣平糶於五月  
初一日恭摺奏

聞當即先令候補知府張良弼星馳赴浙確查米價情

形迅速回報正在一面料理輓運間即准程元章  
咨稱閩省運到台州穀石已行布政使派撥在案  
浙屬現在二麥蠶絲俱幸豐收似可無庸糶濟如  
有未經起運之穀緊為停止等語臣等伏思浙省  
春間米價增昂今二麥蠶絲旋獲豐收米價漸減  
此皆仰賴我

皇上福庇羣黎萬民共慶臣等不勝欣慰除前經運往  
台州穀二萬石外其尚未起運穀石即行停其輓

運矣理合奏

聞伏乞

睿鑒為此謹

奏

總惟仰賴

上蒼恩慈耳覽奏曷勝欣慶或因卿等大公無我之誠念  
所感亦未可知封疆諸臣果能將國家政務不分彼此  
視為一體竭力維持自蒙

天地神明垂察賜祐也

同日又

奏為恭懇

聖恩以愜輿情事竊惟天妃明神功昭清晏德庇商民  
聲靈夙著於寰區顯應尤傳於閩海康熙十九年  
提督萬正色克復廈門神靈協助欽奉

聖祖仁皇帝敕封護國庇民妙靈昭應弘仁普濟天妃又  
靖海將軍施琅進征臺灣師次平海澳時方憂旱

井澤為枯因禱於神泉源驟湧官兵咸被其澤嗣後默相

王師功成底定

敕建神祠於原籍莆田縣湄州地方并

頒敕文以紀功德又加封天后竝

允冊封琉球國使臣海寶之請令該地方官春秋祭祀在

案康熙六十年臺匪竊發鹿耳門海水驟長數尺舟師揚帆直進七日之內克復全臺嗣經巡臺御

史臣 禪濟布等奏請荷蒙

皇上特頒

御書神昭海表匾額敬懸湄州暨廈門臺灣三處

宸翰輝煌照臨海澨上年土番不法臣欽遵

諭旨徵調官兵六千餘員名并一切錢糧軍火器械載  
船一百數十隻經歷重洋風恬浪靜安抵臺灣剋  
期奏捷是皆

聖主敬禮神明得邀天后宏施庇護感應之理昭然不

其至於出哨官兵商艘賈舶往來海面洪濤怒浪  
神為顯佑之處不可勝紀所在沿海商賈兵民奉  
祀最極誠敬而於省會尤盛查福建省城南臺地  
方舊有神祠為萬民瞻禮之所臣等不揣冒昧懇  
求

聖恩俯照湄州等處竝頒

御書匾額

敕令春秋祭祀照依龍神之例督撫依期主祭臣等更

有請者伏惟天后凡在江海處所靈應如響其各省會地方如曾建有祠宇而未經設立祀典之處并請

降旨一例舉行則崇德酬功之

令典昭垂萬禩矣為此謹

奏

諛部議奏

福建總督

臣

郝玉麟謹

奏為請

旨事竊查貯庫軍器關係綦重聽其朽敝甚非所宜

臣

於上年赴任路過泉州府面訊該府庫貯軍器據

稟現存戰箭二萬枝

臣

調取驗看略加修整尚堪

應用及

臣

抵任後查得省庫所貯盔甲甚多行令

布政司造冊具報會同撫

臣

趙國麟赴庫查驗除

廢礮八十餘門位難以修整又甲械內實屬朽爛

無用者鐵綿甲九千三百餘身鐵盔九千七百餘

頂排線交鎗等一萬六百餘桿只堪鎔鐵其餘不計外查尚堪修整可備營伍之需者有鐵盔九千九百餘頂鐵甲綿甲竝甲頁共一萬三百身有零鳥鎗交鎗線鎗等項除從前撥給鎮標各營竝失風戰船以及征臺應用尚有堪修整者一千四百餘桿又福州府海防同知庫內大小鐵子鉛子共七萬三千六十餘斤閩縣庫內大小鐵子四十八萬六千餘斤又窩蜂子四千六百一十餘斤尚有

黑鉛鐵斤并雜項鐵器甚多俱無斤兩容臣查明

咨部外臣再查庫貯軍裝器械係我

朝平定耿逆及鄭克塽等案收貯各庫報部在案歷  
來各員多不經心曬晾並不造冊具報上司查驗  
臣因到任訪問始知而朽爛無存者已難數計若  
行追賠則事經數十年官非一任難以指實著追  
如再因循閩省地方潮濕年復一年必致朽爛更  
多實屬可惜今臺地現議添兵如蒙

皇上俞允軍裝器械在所必需其有堪修整者可否容  
臣酌量修整收拾務期堅銳利用修整完竣分別  
加謹收貯取具收管備案如有應配用之處造冊  
報部至外府各縣所貯軍器現在檄查當一併酌  
量辦理是否可行臣未敢擅便謹具摺恭請  
聖旨遵行伏乞

睿鑒謹

奏

足見留心地方庶務嘉是覽之但不可務小而忽大須  
將此等事件作為行有餘力則以學文之舉方始克稱  
鉅細不遺也

同日又

奏為奏

聞事竊照臺灣北路土番恣肆不法仰蒙

皇上指示機宜官兵剋期蕩定而逃竄餘孽務須盡其

根株免致滋事經

臣

奏明酌留官兵駐防搜捕續據各該文武呈報官兵  
奉行搜捕以來斬獲有名兇番一十九名生擒一  
名又據內山生番殺獻番首十顆番耳九隻前來  
軍營請賞餘番懾威膽落逃匿深山莫可踪迹  
思搜察愈急潛匿愈深若聽民番斬馘請賞恐致  
冒濫妄殺之弊非所以安良番而靖地方也臣即  
一面出示令其自行投出聽候審訊一面著令土  
官通事入山曉諭嗣據報稱有大甲西等社逃番

男婦一百零二名口盡行救出竝無一名漏網隨  
准巡臺御史暨提臣王郡各咨同前由到臣所有  
搜捕臺番餘孽已淨緣由理合恭摺奏

覽

聞再據總兵蘇明良竝臺灣道府稟稱五月十九日夜  
水仙宮前鋪民陳寶蠟燭店內失火文武各員齊  
往協力撲救緣東南風盛人稠地狹風急火猛人  
力難施延燒三百餘間除被火民人行司量加賑  
恤竝飭該地方文武不時誠諭居民加謹小心防

範外合併奏

聞伏乞

皇上睿鑒為此謹

奏

前經有旨防火之具不但臺灣一府凡所屬地方皆應飭令預備實力行之毋忽

雍正十一年八月初四日福建總督臣郝玉麟謹

奏為海嶼鎮協各營兵食最關緊要酌議分貯穀石

以備接濟事竊照閩省濱海鎮協各營向係分防  
島嶼者本地產米稀少全資內地接濟每遇青黃  
不接米價增昂更或風信遲阻商販不前民有官  
穀平糶之資營兵未免艱於粒食即如海壇一鎮  
孤懸海島外附三十六嶼地不產米今年六月內  
因風信不順該鎮總兵官陳勇以營兵乏食客販  
不至詳請借給倉穀二千石經臣飛飭福州府照  
數運借去訖臣思邊海協營如海壇之僻居島嶼

者不止一處似應通盤籌畫以備接濟庶不致兵食有缺乏之虞除汀州漳泉以及延建邵武等處地方或係產米之處或商販不虞缺乏無庸置議外其福寧一鎮界連浙省前任鎮臣顏光旰奏請設立倉儲今現貯穀六千五百餘石又南澳一鎮地居海澳原任鎮臣許良彬奏請捐貯倉穀經前督臣高其倬撥貯穀五千八百五十七石此二處倉儲已足亦無庸置議外若金門鎮額兵二千三

百餘名地在孤島之中係屬海外要區澎湖協額  
兵二千名談協控制重洋為全臺門戶閩安協額  
兵一千六百三十餘名地方濱臨大海產米甚少  
烽火營額兵九百名談營屹立海中係與浙江洋  
面聯界要汛銅山營額兵一千二百名四面環海  
本地甚少田耕日食全賴商販凡此鎮協各營亟  
應按其兵額綢繆未雨庶幾有備無患臣擬於海  
壇鎮酌貯穀四千三百石金門鎮亦酌貯穀四千

三百石澎湖協酌貯穀四千石閩安協酌貯穀三千二百石烽火營酌貯穀一千八百石銅山營酌貯穀二千四百石以上共貯穀二萬石於每年青黃不接之時借給兵丁免其加息秋收散餉扣除買補完倉責令該管鎮將盤查出結陞遷離任列入交代則海疆守汛兵丁永沐

皇仁於無既矣此項穀價臣案查雍正五年有浙省運閩截漕穀二十萬石現在穀價銀五萬三千八百

餘兩原係

題奉

俞允買米存貯之項閩省本年早稻豐登現在收穫晚  
禾亦極茂盛應請動支前項穀價乘時採買建倉  
收貯以備沿海鎮營接濟兵食是否可行仰懇

皇上指示倘蒙

俞允另行恭疏具

題臣謹繕摺具

奏伏乞

皇上睿鑒施行謹

奏

兵食最關緊要應如是辦理者照所議具疏題請

硃批諭旨卷二百十四之五

欽定四庫全書

硃批諭旨卷二百十四之六

硃批郝玉麟奏摺

雍正十一年九月初二日福建總督臣郝玉麟署

福建陸路提督臣阿爾賽謹

奏為請

旨事竊照閩省福興泉漳四府并福寧一州屏藩邊海  
控禦島夷設有水陸二提督以及福寧漳州金門

海壇南澳五鎮互為犄角濱海營制已極嚴密其  
延建邵汀四府界連廣東江西浙江三省水陸衝  
衢惟汀州設總兵一員其餘皆係協營控制管轄  
尚未得宜查汀鎮所轄邵武延平二協內延平距  
汀州七百五十里甚屬遼遠更有建寧一協竝浙  
閩兼轄之楓嶺一營遠隸福寧鎮管轄相隔千餘  
里之外考驗弁兵往返艱苦一切往來文稟動經  
四五十日始得遞到倘遇緊急公事難保必無遲

誤是汀鎮之於延平協福寧鎮之於建寧楓嶺等  
協營不獨鞭長莫及亦且耳目難周似應因地制  
宜未便因循悠忽臣等查建寧所屬浦城松溪等  
縣與浙江龍泉慶元等處山川相錯又該協駐劄  
府城濱臨建河實為水陸要區延平近在肘腋楓  
嶺即其門戶應請將建寧協副將改設總兵以延  
平一協楓嶺一營歸其管轄控制浦城等處并扼  
仙霞嶺要隘與汀州福寧二鎮亦互為犄角更得

聲勢聯絡矣其水路要隘之處應添防汛兵丁臣  
等斟酌撥補以嚴汛守至汀州鎮仍轄邵武一協  
暨本標三營福寧鎮仍轄連江羅源桐山暨本標  
共六營汛營制俱屬適均而各鎮稽查易周一切  
公務不致遲誤似於地方有裨緣係改協為鎮臣  
等未敢遽行具

題理合恭請

聖主指示謹繕摺具

奏伏乞

皇上批示遵行謹

奏

會疏題請聽候裁奪

福建總督

臣

郝玉麟福建巡撫

臣

趙國麟謹

奏為據情轉奏事本年八月十七日據候補知府張

良弼稟稱

良弼

家本寒微世受

國恩親父

傑

由天靖衛守備荷蒙

皇上天恩特擢廣西梧州協副將又奉

命護理廣西提督印務調任廣東福建等省今現任雲

南騰越協副將

良弼

一介庸愚毫無知識由福建

福寧州知州補授本省理事同知陞授知府

聖主洪恩天高地厚

良弼

父子即捐糜頂踵未足仰報

萬一感激之忱倍深踴躍伏念

良弼

賦性愚拙歷

任以來一切政務雖竭蹶辦理惟恐或有遺誤時

懼不能勝任而於弓馬營伍事務自幼跟隨父任

曾經留心學習伏覩我

皇上至聖至明凡於用人之道悉皆量才任使查前任  
福建水師提督許良彬現任江南徽州營叅將楊  
文成均係候補知州改補武職良弼自揣文武雖  
係兩途均為

朝廷出力懇祈援例仰請

皇上恩准

良弼

以武職改補則犬馬愚誠矢圖報於生

生世世矣為此據實具稟等語臣等查候補知府

張良弼自服官閩省以來辦事勇往直前頗為努力今據稟請援例改補武職情詞甚屬誠懇該員年力富強人材壯健驗其弓馬亦屬可觀應否准其改補

洪恩出自

聖裁倘蒙

俞允另行給咨送部引

見臣等不敢沮抑下情謹據實恭摺具

奏伏乞

皇上睿鑒謹

奏

有旨諭部

同日又

奏為恭報閩省早稻收成分數仰祈

睿鑒事欽惟我

皇上念切民依重農貴粟各省收成分數無時不在

宵旰疇咨之內茲據布政使劉藩長彙報福州府屬閩  
縣古田永福三縣收成均有十分候官長樂二縣  
收成均有九分福清連江閩清三縣收成均有八  
分羅源縣收成七分興化府屬莆田縣收成九分  
仙遊縣收成十分泉州府屬晉江永春德化三縣  
收成均有十分南安惠安二縣收成均有九分同  
安溪二縣收成均有八分漳州府屬平和詔安  
二縣收成均有十分漳浦南靖長泰三縣收成均

有九分龍溪海澄龍巖漳平寧洋五縣收成均有  
八分延平府屬順昌將樂大田永安四縣收成均  
有九分沙縣尤溪南平三縣收成均有八分建寧  
府屬政和甌寧崇安浦城壽寧五縣收成均有九  
分建安建陽松溪三縣收成均有八分福寧州收  
成七分所屬寧德縣收成八分福安縣收成六分  
邵武府屬邵武縣收成十分建寧光澤二縣收成  
均有九分泰寧縣收成七分汀州府屬長汀寧化

上杭連城四縣收成均有十分清流武平歸化永定四縣收成均有九分理合分晰彙報其臺灣府屬每年收穫較內地稍遲容俟報齊之日另文具報合併聲明等語

臣

等伏查閩省仰蒙

聖主福庇連年俱慶有秋今歲收成更比往年豐稔現在米價每石自八錢起至一兩不等民食充足荷蒙

皇上教養深仁風俗漸臻淳厚械鬪盜劫等案較前頗

少海洋陸路地方俱各寧謐晚禾亦極蕃盛臺灣  
府屬早稻收成數容俟稟報到日具

奏外所有內地福州等八府及福寧一州各縣早稻  
收成數理合據實奏

聞伏乞

皇上睿鑒為此謹

奏

閩省早稻收成數以手加額欣悅覽之

謹

奏為姦民私載番人潛入內地事竊照閩省人民貿易外國呂宋地方及偷渡在彼久住者甚多該地番夷資財豐裕往來熟識難免引誘之弊亟當防微杜漸經臣於洋船酌添水手嚴禁偷渡案內備將情形奏

聞欽奉

皇上硃批諭旨 臣仰遵

聖訓時時儆惕刻刻留心每見文武屬員嚴令加謹稽  
察毋得稍懈因閩安協副將張天駿素常辦事幹  
練精細才具明敏特令其密加留心察訪據實速  
稟去後嗣據張天駿稟稱有久住呂宋福寧州民  
帶有呂宋夷人二名出租船番錢一百五十圓船  
主出有保狀與彼處夷主其番人帶有四甲箱番  
錢約計五千金在大擔門外雇小船乘夜到漳州

福河廠蔡家村內投住欲在漳泉招人歸伊天主  
教等語臣聞聽之下不勝駭異適汀漳道郭朝鼎  
因公在省該員精明強幹才猷兼備臣與撫臣趙  
國麟當即密諭令其星往確查慎勿漏洩茲據郭  
朝鼎稟稱訪得番人攜銀前來內地果有其事遵  
即密同漳州府知府王之琦選差妥役拏獲船戶  
劉前郎水手黃祿訊據供稱有久住番邦的福寧  
州一名叫蔡祖帶有番人名叫聖哥蔡祖送到

後坂社嚴秀才小名登官家裏隨諭署龍溪縣知縣孫國柱帶役拏獲嚴登并搜出天主教圖像等書續於嚴登家內搜出番人一名又於嚴登家草堆內搜出番人聖哥一名現押嚴登究出蔡祖務獲嚴審引誘番人潛至內地確情清查番人帶來銀兩有無煽惑良民訊明詳報所有番人二名已將善言撫慰安頓妥協處所等語除檄飭究審外臣與撫臣查番人住居外國若非蔡祖勾引何敢

帶銀潛入內地其勾引之蔡祖私載之船戶劉前  
郎水手黃祿窩留番人在家并搜出天主教圖像  
之武生嚴登等均應按法從重治罪以儆愚民至  
番人聖哥等不應聽從引誘帶銀潛至內地誘人  
入教煽惑愚民惟是夷人不知

天朝法紀即按律治罪彼亦何辭但臣等伏覩我  
皇上天地為心包涵萬國凡於外域遠人靡不

恩予矜憫應俟此番審明番人果有攜帶銀兩逐一查

出卽覓呂宋便船將該番竝銀兩一併送至呂宋  
交明彼地番夷頭目收管使外夷咸知

聖朝稽察周密法度森嚴不敢有犯更昭

聖主寬大洪恩畏威懷德海島遠夷同聲感激矣所有

臣等辦理此案愚見復經密商觀風整俗使臣劉

師恕署陸路提臣阿爾賽水師提臣王郡俱各意

見相符但臣等愚昧淺見是否有當伏乞

皇上睿鑒訓示遵行為此謹

奏

嚴懲內地勾引之人從寬釋放遠夷辦理甚屬妥協

雍正十一年十一月初一日福建總督臣郝玉麟

福建巡撫臣趙國麟謹

奏為欽奉

上諭事雍正十年十二月二十日奉

皇上硃批布政使劉藩長奏請

賞撥海關稅餘銀兩留充公用一案并接大學士張廷

玉寄字內開欽奉

上諭命<sub>臣</sub>等將養廉公用各項妥帖計議辦理至於錢糧闕係緊要劉藩長任內那墊之數著將劉藩長名下應得養廉全扣補完其從前潘體豐那墊未清之項著落潘體豐賠補如力不能完亦將劉藩長養廉逐年扣補欽此<sub>臣</sub>等欽遵

諭旨悉心計議隨經詳細恭摺

奏覆所有劉藩長任內那墊之數飭將應得養廉速

即補完具報其藩體豐那墊未清之項嚴令劉藩  
長逐一追補去後茲據劉藩長稟稱藩長一介庸  
愚茫無知識仰蒙

皇上畀以閩藩重任職司錢糧出入

殊恩異數毫無仰報通省各員養廉已蒙

聖主賞給至於辦理公務更有耗羨抵用理應通盤籌  
畫權衡緩急斟酌辦理乃藩長賦性愚拙遽以耗  
銀徵解不齊

奏請撥給海關盈餘銀兩以充公用實屬冒昧之至  
荷蒙我

皇上洪慈不加罪斥

敕將

藩長

那墊之數於名下養廉補完潘體豐從前未

清之項如力不能完亦將藩長養廉逐年扣補欽此欽遵

藩長  
自蒙

聖訓無時不深悚惕感激愚忱即世效犬馬亦難報

君恩於萬一伏查

藩長

原奏潘體豐任內那墊銀七萬

五千六百餘兩今已據各屬完解耗羨官莊并呂  
大雲完解支領修城銀兩以及歸補等項共收過  
銀六萬三千五百四十餘兩未完銀一萬二千六  
十餘兩內呂大雲未補銀四千三百一十四兩現  
在行催完補外據潘體豐之子潘應召稟稱伊父  
任內前署總督史貽直長支養廉二千五百九十  
八兩零前總督劉世明長支養廉五千一百五十  
六兩零稟請催補等語業經轉詳咨催在案至潘

長任內那墊銀一萬六千餘兩凜遵

聖諭已將本任并前任內養廉湊足全數補完今據各屬將前項民欠耗羨銀一萬六千餘兩陸續完解清楚現同藩長補完之數一併存貯在庫理合分晰造冊送核稟請

奏達

聖鑒藩長不勝惶悚之至等語臣等查劉藩長自蒙聖訓以來感激

天恩力圖報効其愧悔悚惕之心時形於色茲據稟伊  
任內那墊銀一萬六千餘兩已將養廉湊齊補足  
其各屬未完前項耗羨銀一萬六千餘兩已據陸  
續完解清楚一併存貯在庫造具清冊前來臣等  
公同查核無異除史貽直劉世明長支養廉呂大  
雲未完修城各銀兩現在移行嚴催完補外所有  
劉藩長感激

聖恩遵

旨完補并據各屬解完耗羨緣由理合據實奏  
聞伏乞

睿鑒謹

奏

史貽直長支銀兩著於潘體豐劉藩長名下追補還項  
餘俱覽悉

同日又

奏為欽奉

上諭事本年八月二十七日接內閣字奉

上諭朕聞福建古田縣知縣趙琳居官聲名甚好著詢  
問郝玉麟趙國麟若趙琳居官果優著伊等酌量  
或知州或同知知府以人地相宜之缺題補欽此

臣等

伏讀

諭旨仰見我

皇上鑒拔人材之至意查古田縣地方最屬遼濶縣治  
多係大山民俗獷悍趙琳化導有方寬嚴並用聲

名頗好臣等正擬有相當缺出請

旨陞補因古田最關緊要一時未得其人地相宜之員

尚未題請茲欽奉

上諭

聖明無遠弗照查該員現丁母憂除會疏

題請給假治喪回閩之日俟有人地相宜缺出臣等

酌量請

旨陞補以示鼓勵合先據實恭摺

奏覆伏乞

皇上睿鑒謹

奏

給假治喪俾得公私兩全甚善似此出色之員當破格  
題請優擢以為親民者勸

雍正十一年十一月十八日福建總督臣郝玉麟

福建巡撫臣趙國麟謹

奏為恭報閩省晚稻收成數仰祈

睿鑒事竊查閩省比年以來時和歲稔本年早稻收成  
更為豐裕業經臣等據實奏

聞在案今當晚稻登場之候行據布政使劉藩長彙報  
福州府屬長樂永福古田三縣收成均有十分閩  
縣連江二縣收成各有九分侯官福清閩清三縣  
收成均有八分羅源縣收成七分興化府屬莆田  
縣收成九分仙遊縣收成八分泉州府屬德化縣  
收成十分安溪縣收成九分晉江惠安同安三縣

收成均有八分南安永春二縣收成各有七分漳  
州府屬漳浦漳平和三縣收成均有九分龍溪  
海澄南靖長泰龍巖寧洋六縣收成均有八分詔  
安縣收成七分延平府屬大田縣收成十分南平  
順昌將樂沙縣尤溪永安六縣收成均有九分建  
寧府屬甌寧建陽政和浦城四縣收成均有十分  
建安崇安松溪三縣收成均有九分壽寧縣收成  
八分邵武府屬邵武光澤二縣收成各有十分泰

寧縣收成九分建寧縣收成八分汀州府屬長汀清流上杭永定連城五縣收成均有九分寧化歸化武平三縣收成均有八分福寧州收成八分所屬之福安寧德二縣收成均有九分臺灣府屬每年早稻收穫較內地稍遲前經臣等

奏明茲據彙報臺灣鳳山二縣早稻收成各有七分晚稻收成各有八分諸羅彰化二縣早稻收成各有八分晚稻收成各有七分并稱臺灣地方本年

秋間偶被風雨並無有礙禾稼等語具報前來臣  
等謹據實分晰陳

奏再閩省多產番薯本年尤為豐收更資民食通省  
米價每石自七錢六七分至一兩零不等民人樂  
業海洋陸路地方俱各寧謐合并奏

聞伏乞

皇上睿鑒謹

奏

覽奏閩省晚稻收成分數及米糧價值情形朕實額手  
欣慶此皆卿等忠勤任事感荷

上天慈佑之所致但當益加寅畏毋起絲毫滿肆之念勉  
之更勉可也

雍正十一年十二月二十六日福建總督臣郝玉

麟福建巡撫臣趙國麟謹

奏為據實奏

聞仰祈

睿鑒事竊照臬司一官為通省刑名總匯必須事事詳慎一秉至公始為允協茲按察使李玉鉉自上年到任以來臣見其年齒雖老然於刑名案件精力尚能辦理雖遇事每多偏執臣屢次推誠誨勉該司當下亦常知省悟詎意近來情性甚覺放縱好惡偏私多以剛愎自用種種悖謬難以悉舉而且任意瞻徇姻戚毫無忌憚牢不可破臣國麟荷蒙皇上畀以巡撫重任視事之後於所屬各員賢否詳慎

訪察經將按察使李玉鉉居官時有拘執之處於  
雍正八年十一月間具摺奏

聞欽奉

硃批覽奏俱悉仍當不時訪察加意體驗可也欽此維  
時李玉鉉旋因患病回籍上年奉

旨復任臣欽遵前奉

諭旨不時加意訪察婉切開導該司初時尚知檢點近  
來拘執之性又復如故難以冀其轉移臣等竊思

辦理

朝廷公事總在殫竭公忠無纖毫人我之見始能歸於  
至當若偏執已性任情好惡必至悖謬所關甚鉅  
今李玉鉉年已七十三歲看其辦事雖能支持然  
偏執悖謬之處較前尤甚動輒以年老辭官為語  
言詞舉動顛倒反覆恬不知怪臣等因其素常操  
守尚好辦事亦勤是以未即指叅但臬司係風憲  
大員為通省百職之表率士民之瞻仰職任綦重

臣等不敢瞻徇隱諱謹據實密摺奏

聞伏乞

皇上睿鑒謹

奏

李玉鉉原係庸材所奏知道了

同日又

奏為姦民私載番人潛入內地謹將審擬罪名恭陳  
聖鑒事竊查福安縣姦民蔡祖本名蔡祝勾引呂宋番

人攜帶銀兩潛至內地欲在漳泉招人歸伊天主  
教一案情由先經臣等恭摺奏

聞彼時因為首勾引之姦民蔡祝潛逃臣等一面懸賞  
緝拏並專差星赴福安縣密諭知縣王玲務期弋  
獲如稍踈縱嚴行叅處該令當即分差幹捕四路  
緝拏隨於西演地方深山之內拏解前來當即押  
發按察司會同布政司嚴訊去後茲據該司等行  
據縣府將各犯審明錄供解司復訊議擬會詳前

來<sub>臣</sub>等核審無異查天主一教本屬妄誕最易煽惑愚氓<sub>臣</sub>等屢行查禁蔡祝膽敢在外域呂宋地方向番人說及行教情事於雍正十一年六月內勾引番人聖哥携帶銀兩番經木箱行李等物給船戶劉前郎番錢五十圓搭船於七月十九日至大擔門外前郎慮恐塘汛盤詰復向聖哥取番錢三圓僱不識姓名小漁船一隻潛入內港於二十日早蔡祝前郎同引聖哥至嚴登家住下前郎即

回廈門嗣蔡祝復得聖哥番錢十五圓亦回福安  
縣原籍先有番人萬濟公於雍正十年間自呂宋  
至廣東香山澳因聞嚴登原係奉過天主教之人  
來訪嚴登欲行伊教遂與聖哥一同藏匿嚴登家  
內禮教誦經旋被訪聞拏獲尚無歸教人民再四  
詰訊各犯矢口如一水手邱招行保鄭瑞於事發  
查拏之後同赴廈門同知衙門首報臣等查蔡祝  
將蔡祝于秋審時當定擬情實監候仍嚴加防禁毋忽  
勾引番人之處供吐不諱法不容逭應如司府所

擬合依左道惑人律絞監候嚴登合依為從屬有  
司者僉妻發邊外為民船戶劉前郎水手黃祿合  
照偷渡船隻水手杖一百徒三年例各杖一百徒  
三年又水手邱招合依知人欲告自首者減二等  
杖八十徒二年行保鄭瑞合依不將偷渡情由首  
明例責四十板徒三年今事後出首應照知人欲  
告自首者減二等律杖八十徒二年均無枉縱嚴  
登家中搜出天主教圖像等書飭行銷毀番人聖

哥萬濟公臣等宣佈

皇上寬大洪慈並

天朝法紀該番等始則戰兢恐懼後則踴躍歡呼望

闕叩頭謝

恩訖隨將蔡祝劉前郎所得聖哥銀兩照數飭追以及  
該番帶來木箱行李番錢等物逐一交給收領差  
員押往廈門諭令廈門同知即覓呂宋便船令船  
戶照看載回彼國又番人萬濟公一面差押至廣

東沅明該省督臣發交香山澳番目收管以昭  
聖主天恩所有審擬蔡祝等各犯罪名以及遣回番人  
緣由理合繕摺恭

奏伏乞

皇上睿鑒謹

奏

覽奏知道了摺尾並無另疏題請字樣何耶

同日又

奏為請

旨事竊照閩省沿海居民多有販洋為業往來外域經

查獲

營越息以致逗留番邦者茲據漳州鎮道府縣詳

此案人犯之員弁等當加獎賞以示鼓勵

報查獲陳魏楊營等犯攜帶妻妾僕婢並行李等

物於大擔門外暗雇小船裝載回家經漳州府訊

據陳魏供稱犯生向在廣東貿易於康熙五十三年

年買有茶葉貨物在廣搭船往噶喇吧五十五年

娶了妻室楊氏原是福建人本年犯生回至廣東

買了磁器等貨復往吧國賣完了貨又賣布疋稍有利息原去的船已回棹了隨於五十六年奉禁了洋船隻稀少回來不得並不是甘心久住番邦自蒙

萬歲爺天恩開了洋禁雍正七年纔得回到家裏住了三年十年上在蘇州捐了監生又買茶葉等貨仍在廣東搭船到噶喇吧原是做生意的人不能歇業歷次往來上稅照票俱托船戶料理的家中尚

有老母兄弟常寄銀信回家養贍今年春間妻室  
不在了留下三箇女兒因無子買了兩箇番妾兩  
箇小番使女四箇番僕都是當著荷蘭番官明白  
買的帶了些番米行李回家眷回歸故土侍奉老  
母永為

盛世良民並無違禁貨物起身的時節夷目呷呷丹配  
了郭佩的船本年五月裏到大擔門外犯生因今  
次未曾請得牌照汎口盤詰嚴謹為此雇了小船

由大擔外洋回家犯生從前羈留外邦實非得已  
並不是甘心住在番邦的若忘了故土的人於今  
就不挈眷回鄉了只求詳察訊據楊營供稱小的  
原在同安縣做生意雍正六年正月在廣東將本  
銀三百兩買了些茶葉磁器搭船到噶喇吧娶了  
妻室郭氏是中國人原要隨船回來的小的因染  
了病至八年五月裏仍回廣東買了貨於九年正  
月又往吧國這幾次出洋納稅照票都是船主代

為料理的小的有箇哥子楊課原在吧國娶有嫂  
子生下兩箇姪兒上年哥子不在了小的娶的妻  
室生了兩箇兒子一箇女兒年紀尚小又買了一  
箇乳媽三箇番僕俱係番官說定身價買的連嫂  
子姪兒共十一口向番目呷呷丹說明搬眷情由  
他配給了高鳳的船於今年六月裏到了大擔門  
外因沒有照怕塘汛查驗雇了一隻小漁船由大  
擔外洋到家就被本縣拏了小的原是守分良民

自雍正五年奉

恩旨開了洋禁漳泉的百姓得到番地做生意如今家給人足無不感戴

國恩不但小的不敢忘本即現在外邦的俱有思歸之念小的因愚蠢無知這次誤犯私渡禁令只求超釋等情供吐在案正在叙詳間復據陳魏楊營為叩求轉達下情事呈稱魏等邊海愚民向在吧番貿易魏因生意牽纏又因禁洋以致淹留番地

營自開禁後出洋不合無照私渡回家甘罪何辭  
但切思漳南一帶人稠地瘠向苦食用不敷深幸  
比年以來

聖化覃敷海洋寧謐魏等往來生理獲利豐家實皆  
皇恩

帝澤沾被無窮今魏等情願將所獲餘資仿照社倉之  
例魏捐穀八千石營捐穀五千石并各造倉廩備  
賑鄉黨稍伸報效以贖罪愆乞憐魏等愚蠢無知

宏施祝網加惠閭閻仁澤永垂萬年等語將陳魏  
等分別議擬由司會詳前來臣等伏查雍正六年  
間前督臣高其倬疏稱留住噶喇吧呂宋之人係  
康熙五十六年定例以前者定限三年之內准其  
回籍如康熙五十六年定例後私去者自不應准  
其回籍等因會

題欽奉

諭旨洋禁初開禁約不可不嚴以免內地人民貪利飄

流之漸其從前逗留外洋及違禁偷往之人不准回籍欽此臣等伏讀

聖諭我

皇上訓誡愚民不思故土逗遛外地並禁其貪利飄流之漸者實屬

天心慈愛之深誠亘古以來所未有也今查陳魏於康熙五十五年自廣東往噶喇吧經營生理至雍正七年始行回家係在雍正六年欽奉

諭旨不准回籍之後雖據供從前因生業牽纏又緣禁  
洋船隻稀少欲歸不能並非甘心異地質訊鄰佑  
僉稱陳魏實係良民但該犯今於本年七月間未  
有牌照挈眷偷渡回籍實屬不合楊營雖係雍正  
六年奉開洋禁之後徃番貿易但亦無照攜帶眷  
口偷渡潛回查陳魏違禁回籍之處律無正條應  
與楊營均照偷渡緣邊關塞者杖一百徒三年律  
應各杖一百徒三年船戶郭佩高鳳應照偷渡臺

灣人等知而不舉例各杖一百徒三年均屬不枉  
今據陳陳魏楊營呈稱情願共捐穀一萬三千石建  
造倉廩備賑里黨以贖罪愆臣等備查各該犯攜  
眷回籍情形依戀故土與甘心異域者有間可否  
仰額

聖慈准其捐贖予以自新船戶郭佩等照依干連人犯  
例酌量完結

洪恩出自

聖裁臣等未敢擅便謹據情恭摺具

奏伏祈

睿鑒謹

奏

念若等依依故土之情應准其捐贖但飭行地方有司  
時加約束毋使任意他徃

福建總督臣郝玉麟謹

奏為欽奉

上諭事本年十二月初九日接到大學士伯鄂爾泰字  
一封內開雍正十一年十一月十一日奉

上諭馬召南本係庸常之人朕知之甚悉從前在廣西  
時諸凡懈弛不能勝任是以調用福州城守副將高  
其倬曾奏伊到閩省後辦理營務井井有條署督標  
中軍一切俱能切實料理管束弁兵甚是嚴明寔係  
賢能之員可用之才等語當經朕批飭馬召南豈能  
如此奇特高其倬不過見其相貌故生賞鑒諭令留

心詳察又劉世明因提督張起雲之患病保奏馬召南歷練老成可以委令前往協理等語馬召南豈協理提篆之才劉世明所奏大誤亦當即批飭又郝玉麟因漳州總兵員缺保奏馬召南歷練老成熟諳營務整頓有方委係才具出衆之員等語又阿爾賽保奏馬召南勤敏練達請以署福寧總兵印務朕俱未允行又因馬召南年來辦事未知何如或能革除舊習奮勉上進亦未可定復降旨詢問郝玉麟郝玉麟

又極力保薦並稱到任以來實心實力辦理營務其平日居官阿爾賽稱其才具可用等語朕因郝玉麟身在地方自必知之甚確是以降旨令馬召南署理福寧鎮總兵印務近聞馬召南居心貪鄙舉止輕浮前署漳州總兵印務時因備辦執事等物竝供給宴會一切使用每營各費銀三四十兩不等又收取甕城租錢藉賞兵名色入已又收受土儀禮物甚多歷歷有據且於一切營務毫無料理惟知宴會演戲日

以繼夜起更定礮不限更次且有叅革守備張定國  
與戲旦當場扮演而馬召南附和取樂兵民人等俱  
知似此貪劣無恥行止不堪之員郝玉麟阿爾賽豈  
無見聞乃竟毫無覺察且謬為保薦是何意見著嚴  
行申飭馬召南劣蹟果實著郝玉麟一一查明具本  
叅奏絲毫不得回護前奏瞻徇隱匿欽此遵

旨寄字到臣臣跪讀

諭旨不勝戰兢恐懼惶悚無地馬召南本係庸常之人

久在

皇上洞鑒乃臣愚昧淺識祇就其平日辦理營務之處  
具摺保

奏不意該副將於署漳州總兵任內有如此劣蹟誠  
屬下愚不移仰見

聖主知人之明鑒察無遠弗至臣身在地方不能覺察  
謬為保薦咎無可逭荷蒙我

皇上格外洪恩詳切訓誨

敕令查明題叅臣即捐糜頂踵亦難仰報

君恩於萬一查福寧乃沿海重鎮馬召南似此貪劣無  
恥不便仍令署理臣現在酌量委員前往福寧暫  
行署理該鎮印務馬召南劣蹟容臣逐一查明據  
實

題叅請

旨定奪臣誤保於前悔恨無及斷不敢絲毫瞻徇隱匿  
自罹愆咎也臣謹恭摺具

奏伏乞

睿鑒謹

奏

觀汝存心似有博取仁慈寬厚虛名景象稍若踵襲故步非徒無益於國且恐有害於已一涉善柔則與邊海巖疆之任大不相宜矣總惟效法鄂爾泰斯為盡善不可遺忘前訓誤走邪途慎之毋忽

雍正十二年三月十二日福建總督臣郝玉麟福

建巡撫臣趙國麟謹

奏為欽奉

上諭事竊臣等於上年十一月初一日會

奏布政使劉藩長那墊銀兩已據照數補還貯庫一

案欽奉

皇上硃批史貽直長支銀兩著於潘體豐劉藩長各名下追補還項餘俱覽悉欽此當即飭行該司速即分補完報先於上年十一月十五日尚未奉

旨之前即據史貽直解補前任閩督時預支養廉銀二千五百九十八兩有零移咨臣等飭司收存茲奉諭旨據劉藩長稟稱伊名下遵

旨應分補銀一千二百九十九兩有零已經如數補完潘體豐名下應分補銀一千二百九十九兩據伊子潘應召自限六箇月回籍山東解補等語其史貽直先前還補之項應否發還臣等未敢擅便相應請

旨遵行至此案補還銀兩細數統容分晰咨部查核合  
併陳明伏乞

皇上睿鑒謹

奏

既據解送到閩又何必發還史貽直已曾奏聞矣

雍正十二年五月二十二日福建總督臣郝玉麟  
謹

奏為微弁著有勞績伏懇

皇上格外施恩以示鼓勵事竊照臺灣府治全藉鳳山縣為之屏蔽鳳山一邑又賴鳳彈汎為之保障是鳳彈一汎所關甚重查雍正十年四月初二日匪犯吳福生等聚衆合攻鳳彈汎營盤該汎係茨竹為城所存汎兵不滿二百汎弁係把總黃陞當吳福生率賊千有餘人自四更時合圍攻擊黃陞率衆奮勇拒守直至次日辰時將賊殺死五人擊傷十餘人賊隨解散至初四日賊復會聚聲勢愈重

值提臣王郡督兵馳至賊乃大敗逃散鳳邑臺府  
均得保固實皆黃陞奮勇拒守鳳彈之功臣初聞  
猶恐未確後提臣王郡御史柏修暨軍前大小將  
弁備述始末衆口如一查黃陞係臺地把總定例  
二年俸滿即歸內地以千總補用黃陞今已俸滿  
因吳福生一案准有部咨查取文武疎防各職名  
黃陞亦在其內因格於成例未便拔補經臣調到  
驗看人材弓馬均在可觀甚屬可惜寔係膽勇出

衆功績昭著之弁臣雖在獎賞未足以酬其功可  
否仰邀

聖恩准帶議處疎防之案補授千總或從優以守備擢  
用

洪恩出自

聖裁倘蒙

聖恩破格超用從此海外大小員弁益加感激奮勉力  
圖報效矣應否送部引

見之處伏候

批示以便遵行臣因鼓勵弁員起見不揣冒昧恭摺具

奏伏乞

皇上睿鑒謹

奏

將其拒守却賊功績備悉聲明送部引見題到之日有  
旨

福建總督臣郝玉麟福建巡撫臣趙國麟謹

奏為恭報閩省二麥收成分數事竊惟省耕教稼愛  
養廩於

宸衷問歲祈年收穫關乎民食閩省地方仰荷

聖主福庇屢慶有秋茲屆二麥登場之後據布政使劉  
藩長彙報福州府屬九縣內永福縣收成十分其  
餘九分八分不等興化府屬二縣各收成十分泉  
州府屬七縣內永春德化二縣收成十分餘自九  
分起以至八分漳州府屬十縣內除龍巖平和二

邑地不種麥其餘收成有九分八分臺灣府屬四縣收成各有八分延平府屬七縣九分收成者四縣八分收成者三縣建寧府屬八縣除壽寧一邑地不種麥其餘收成有九分八分以至七分不等邵武府屬四縣內光澤縣收成十分其餘均有九分汀州府屬八縣內歸化縣收成十分其餘有九分八分福寧州暨所屬二縣內寧德縣收成九分餘各有八分又按據各屬陸續具報前來臣等詳

加察核無異並據各稟稱本年自春至夏雨水調  
勻米穀價平臣等備查各屬現今米每石自九錢  
起至一兩零數分價甚平減民食充裕通省雨水  
霑足禾苗滋長臣等於勸農之時通行查勘甚屬  
暢茂是皆我

皇上精誠感格上迓

天庥如響之應臣等不勝歡忭之至惟有倍加敬畏正已

率屬仰副

聖主垂訓之洪慈耳所有各屬二麥收成分數理合恭  
摺奏

聞伏乞

睿鑒謹

奏

覽二麥收成分數雨水米價情形遙頌海疆曷勝額慶  
雍正十二年六月十二日福建總督臣郝玉麟謹  
奏為奏

聞事竊照臺灣番民性本愚蒙行頗恭順前因一二不法匪類滋擾地方仰蒙

皇上天威遠震除惡安良各社番民得以咸安耕種軍興之際寔心效力迨荷

天恩添設官兵捍衛感激歡呼凡遇用夫車輛公務土官通事無不踴躍向前甚屬可嘉茲據臺灣府知府尹士俚詳據鳳山縣知縣陳同善詳稱據岸裏社通事張達京土官敦仔阿打歪加巴眉加由蘇

仕菜等呈為化及不毛冥頑風動願歸版圖事詞  
稱竊惟內山等處生番穴居野處不隸籍中當今  
聖天子仁風遠播德澤宏深凡在昆蟲草木尚知鳴樂  
向榮生番雖居界外猶具人形能無感激之念茲  
沙裏杜生番席由敏等願歸版圖納餉供役等情  
造具歸化生番戶口冊一本到縣隨喚通事張達  
京生番席由敏瓦陳由敏等當堂驗訊據稱沙裏  
社界在獅頭獅尾南勢在巴老遠東勢離岸裏社

三百里因阿打歪敦子同沙裏社原是番親因此  
出來歸化願作好人大小男婦共一百九十九名  
口等供當經各給賞勞諭令歸社并取該通事土  
官約束甘結在案事關生番歸化不敢壅於

上聞合就詳請

題達准予歸化載入版圖以廣招徠等情據此又據  
臺灣鎮道詳報前來臣即批行布按二司確查酌  
議通行在案伏惟

聖朝德化宏敷海嶠番黎欣欣向化茲沙裏社戶口錢糧雖屬無多察其情詞甚屬誠懇似應俯順輿情遂其依歸之念除俟該司等酌核詳覆到日臣與撫臣詳晰會

題外理合繕摺奏

聞伏乞

皇上睿鑒謹

奏

覽奏已悉會題到日有旨

福建總督臣郝玉麟福建巡撫臣趙國麟謹

奏為恭報閩省早稻成熟情形仰祈

睿鑒事竊照本年自春徂夏雨水調勻土膏滋潤栽插  
之際又得大雨疊沛禾苗日漸長茂吐華結實穀  
穗纍纍形若貫珠臣等因公事出郊目覩嘉穀盈  
疇之盛隨順便勸勞農民莫不歡欣踴躍咸稱今  
年穀穗比往年尤為豐滿將來收成自好等語又

據各屬具稟情形相同查栽插在前者現在漸次收穫其栽插稍後之處亦已成熟市米每石自八錢起至一兩有零不等價值平減人民樂業臺灣一府據各地方官稟報雨水霑足禾苗亦極暢發  
臣等感戴

天庥恪遵

諭旨惟有倍加敬畏小心翼翼以仰副我

皇上敬

天勤民之至意耳除收成分數容俟彙報到日具奏外所  
有早稻成熟情形合先恭摺奏

聞伏乞

睿鑒謹

奏

早稻成熟米價平減情形以手加額覽焉實緣卿等文  
武大臣能同心協力忠誠任事有以感召

天和始著斯徵驗也嘉悅之懷筆難悉諭勉之

雍正十三年六月初二日浙閩總督臣郝玉麟謹  
奏為海疆重鎮務在得人仰懇

聖主簡補賢能以收實效事竊照金門鎮總兵許國騰  
病故經臣

題報在案其所遺印務令安平副將高得志署理臣  
查金門一鎮孤懸海島與廈門對峙控制外洋寔  
為臺澎之屏障最關緊要必得幹練之員方克勝  
任理合恭請

皇上揀選賢能

補授以資

料理倘一時未得其人

臣查

或恐未然與朕所記相左

征番之

役同事者不一其人

必立有非常勞效方可稱爲熟績

高得志熟悉水務諳練老成人甚明白且征番著

有勞績前曾委署金門深悉該地情形似可駕輕

就熟可否補放

洪恩出自

聖裁倘蒙

俞允其高得志所遺員缺亦屬緊要容臣另選人地相

宜之員會疏

題補請

旨合併陳明伏乞

皇上睿鑒謹

奏

高得志原籍江南非生長閩粵者可比水務何能遂臻  
精熟朕知其漢伏雖好胸襟甚欠明白況既無出衆之  
藝又無出格之功一旦超擢鎮任殊覺太驟如不得人  
暫令署理以觀後效尚可

雍正十三年七月初一日浙閩總督臣郝玉麟謹  
奏為據實密奏仰祈

睿鑒事竊臣荷蒙

聖恩擢用總督兼制兩省於今年四月抵浙之次即前  
往海寧等縣遍歷東西海塘竝至尖山細加查勘  
建築石壩工程已有十分之六從前深有十餘丈  
者今海底積有漲沙現在最深處不過二丈有餘  
至小塔山則止有一丈五六尺不等看來似易成

功惟一路塘堤內條石塘身者堅固屹立其向用塊石砌築各塘均不若條石之堅整再原係石塘後因坍卸暫將柴薪搶修者甚不堅固此外更有草塘數千丈原因沙土浮鬆不能建築石塘止用柴土堆砌抵禦潮沙更當加謹修整至以上各塘臣訪問十一十二兩年雖經隨時搶修冬底竝未加修隨於彼時同將軍臣傅森撫臣程元章副都統臣隆昇

欽差大理寺卿臣汪漣內閣學士臣張坦麟等面言如此險要工程搶修不過權便一時現在塊石各塘極宜補築柴草各塘均應修整以防風潮不測斷不可因十一十二兩年並未加修倖免疎虞恃以為常況前歲蒙

皇上差內大臣等來浙估築石塘共一萬丈四尺估計工料銀一百七十餘萬兩并荷

睿算指示尖山石壩建後即有漲沙亦可漸次改建石

塘之

旨今應於緊要之處亟宜修築仰慰

聖懷為是諸臣俱以臣言為然臣隨面諭布政使張若震給發銀兩採辦物料一面行令海防同知丈量緊要處所勘估冊報正在恭摺請

旨遵行間不期六月初二日夜風潮猛烈一切塘堤坍塌十之八九甚屬危險臣細訪從前不行加修之故實緣諸臣意見不侔十一十二兩年以來錢糧

雖有節省今一旦坍卸如許之多所費加倍若非  
仰賴

聖主福庇倘潮水灌注塘內民間田園廬舍能保無虞  
時屆伏秋大汛勢難刻緩而石料又一時不能猝  
辦只得照舊暫用塊石柴草分別搶修今工程雖  
將告竣仍應籌畫經久之計查搶修歲修各塘自  
康熙五十四年起至雍正十三年六月歷年所用  
錢糧數至一百六十餘萬而塘工一遇風潮仍多

坍塌不能保固是係人力未盡不可悉諉天災惟有石塘可垂久遠

皇上早已籌及指示甚明即如原任浙江巡撫今大學士臣朱軾任內所築石塘五百丈至今十有餘年毫無撼動其餘凡條條石塘身亦皆完固計有三千數百餘丈今亟應遵照內大臣海望等所估改建石塘次第興築始為萬全惟是條石一時不能猝辦臣與撫臣已飭令多員預行分路採備屆期

酌派工員各分段落趕辦趕築若地方大吏以及總理大臣秉公無私和衷辦理未有成功不速者無如諸臣意見不合每事齟齬將來興舉大工自必更致參差臣受

恩深重何敢顧避嫌怨知而不言竊見海塘所關甚鉅總理大臣未能安詳辦理除堵築尖山石壩工程已有三分之二乃係隆昇一手辦理之事其現議海塘工程可否另委賢能大員總理之處伏乞

皇上聖裁再應建石塘計一萬丈餘尺若非亟亟辦理  
必致稽延歲月務得多員分段趕築庶可計日成  
功查府廳州縣各官俱有地方刑名錢穀之責不  
能分身監督并祈

皇上敕部揀選家道殷實候補候選人員二十員來浙  
照河工之例分段派委監督工程所需條石除本  
省採辦之外江南地方亦有石宕可採即各塘舊  
石亦多有堪用者一併酌量濟用大工告竣不難

沿海地方民人仰戴

皇恩於億萬斯年矣臣不揣冒昧謹陳愚見恭摺具

奏伏祈

皇上睿鑒謹

奏

此奏之可嘉處筆難盡宣奏內各種情形亦朕所備悉

但他人不肯如是爽直耳現與廷臣周詳籌計辦理方  
略議定後另有諭旨



硃批諭旨卷二百十四之六